

Ils Dis da litteratura raquintan

22avels Dis da litteratura a Domat

DA FLURIN ANDRY / ANR

Dals 2 als 4 november han lieu ils 22avels Dis da litteratura a Domat en la halla polivalenta Tircal. Per ils Dis da quest onn èsi impurtant da savair tadlar. «Uss suni bain cuntenta che la lavur d'organisaziun è fatga e ch'ils Dis da litteratura entschaivan bainbaud», ria Silvana Derungs, ina da las commembras dal comité d'organisaziun. Ils ulteriurs commembers e commembras èn Valeria Badilatti, Sabrina Bundi, Martin Camenisch e Sara Hermann. «Da l'autra vart hai jau era in zic 'fifa' e ma dumond, sche nus avain propi tut preparà», tradescha ella. L'organisaziun dals Dis da litteratura è ina lavur che dura tut onn.

«En tschertga da tema e giasts»

Sco che Silvana Derungs di entschaiva la lavur d'organisaziun cun retschertgar tge cudeschs che cumparan durant l'onn dals Dis da litteratura. Ils commembers dal comité studegian tge ed a tgi ch'els pudessan integrar en il program dals proxims Dis.

«Vers favrer èsi da seser ensemen e discussiunar tge tema ch'ins vul tscherner per ils Dis da litteratura actuals, guardar nua ch'ins pudess ir per acturas ed acturs, sch'ins vul engaschar in giast da surpraisa al ston ins dumandar ad uras.» Da primavaira è il program alura quasi pront. Quella giada dumonda il comité a fundaziuns ed organisaziuns sustegn per la realisaziun dals Dis da litteratura. «Alura èsi da cumenzar a scriver ils programs, texts da pressa, far recloma, stampar il program, sa deditgar als detagls e schliar cun il sustegn da Radio e Televisiun Rumantscha las dumondas tecnicas.» Sco ch'ella suspira datti bler lavur: «Cur ch'ins era anc studenta gieva in zic meglier, uss ch'ins lavura ston ins far la lavur a favur dals Dis da litteratura la saira», disch Silvana Derungs ch'è redactura tar il DRG.



Silvana Derungs è ina da las organisaturas dals Dis da litteratura a Domat.

MAD

Raquints en diversas furmas

Durant ils 22avels Dis da litteratura vegni raquintà bler: Venderdi saira cumenza l'actura tudestga Bea von Malchus a raquintar als preschents «Das Schönste aus dem Alten Testament». La sonda cuntinuescha cun paraulas ed istorgias dad Anna Ratti, Theo Candinas dat invista en ses pli novs cudeschs. Ensemen cun Flurina Badel discussiuneschan il psicolog Philipp Ramming ed il schurnalist Arnold Rauch tge che istorgias signifigan en lur professiuns. Andrea Urech preschenta las istorgias curtas «Ova da savun» da Martin Raschèr e Mevina Puorger e Dumenic Andry la nova ediziun

da raquints da Balser Puorger «La glied da Schilana». Accompagnada da la musica da Curdin Janett preschenta Ludmilla Cahenzli (giugada da Justina Derungs) il cudesch «Da la vita da Ludmilla Cahenzli». Dumengia preschentan Claire Hauser Pult e Chasper Pult la nova ediziun bilingua «La Jürada» da Jon Semadeni e Rico Valär la vita e las ovras dal poet Peider Linsel che cumpliss proxim onn seis 150avel anniversari.

Quest onn puspè in Premi Term Bel

Suenter in onn pausa datti quest onn puspè la concorrenza litterara Premi Term Bel: Sonda prelegian Ursicin G.G.De-

rungs, Eva Riedi, Walter Rosselli e Laura Zanger lur texts ch'èn vegnids nominads per quest premi. La segunda giuria cun Maria Cadruvi, Renzo Caduff e Gian Ramming discussiunescha ils texts e tschernan il favurit. Quai po far era il public. Dumengia a mezdi vegnan surdads il premi da la giuria dotà cun 3000 francs ed il premi dal public dotà cun 1000 francs. «Quests premis vegnan sponsurads da la vischnanca burgaisa da Domat», disch Silvana Derungs, «ma cun metter a disposiziun la sala Tircal e differents auters locals ed infrastruttura en chasa sustegna era la vischnanca politica ils Dis da litteratura.»